

四庫全書

集部

欽定四庫全書

集部

漢魏六朝百三家集卷二十二

詳校官庶吉士臣謝恭銘

主事銜臣徐以坤覆勘

總校官檢討臣何思鈞

校對官編修臣祖之望

謄錄監生臣蕭肇鶴

欽定四庫全書

漢魏六朝百三家集卷二十二

漢諸葛亮集題詞

諸葛梁甫吟古今諷誦然遙望蕩陰懷齊三士
此不過好勇輕死者流何關管樂神明悲吟不
止或云梁甫泰山下小山也人君有德則封東
嶽諸葛王佐才思封禪而不得見躬耕隴畝歌
謠託志田疆之倫豈所慕哉出師二表遠匹伊

訓正議兩篇亦湯誓大誥之遺餘則赫蹠數字
能使憾夫解讎壯士刎頸開誠布公集思廣益
一生靖獻之本施於僚佐賢愚悉心所自然耳
戒子書云學以廣才靜以成學周孔之教也晉
世有寫其辭徧勗諸子者其理學始基乎後主
暗弱黃皓陰狡武鄉復親督師旅不居密勿而
君臣魚水常如先帝時東山金縢似反遜之志
則同也郭塢星隕魚復遺恨國勢三分臣心無

二討賊而死始答顧命豈自違隆中之言哉陳
壽立評未極能事崔浩致詰無當論功唐裴晉
公益非之矣

目錄

詔

為後主伐魏詔

表

羣下上漢帝請先主為漢中王表

請宣大行遺詔表

前出師表

後出師表

薦呂凱表

彈李平表

彈廖立表

又

臨終遺表

舉蔣琬密表

奏

上言追尊甘夫人為昭烈皇后

疏

街亭自貶疏

上事疏

公文

公文上尚書

教

與羣下教

又

答蔣琬教

作斧教

黜來敏教

與張裔教

稱姚弋

教

又

與叅軍掾屬教

教

又

書

與關雲長書

與杜微書

答杜微書

答李巖書

又

與張喬書

與張喬蔣琬書

又

又

與蔣琬董允書

與孟達論李嚴書

與李豐書

與劉巴書

與孟達書

與陸遜書

與步騭書

與兄瑾書

又

又

又

又

又

又

又

又

誠子書

又

誠外生

又與劉巴論張飛書

書

與吳王書

上先主書

牋

牋

又

遠涉帖

議

正議

絕盟好議

法

作木牛流馬法

論

交論

記

黃陵廟記

碑

司馬季主墓碑

南中紀功碑陰銘

令

軍令

又

又

軍令

兵軍要誠

詩

梁甫吟

漢魏六朝百三家集卷二十二目錄

欽定四庫全書

漢魏六朝百三家集卷二十二

明 張溥 輯

漢諸葛亮集

詔

為後主伐魏詔

朕聞天地之道福仁而禍淫善積者昌惡積者喪古今
常數也是以湯武修德而王桀紂極暴而亡曩者漢祚

中微網漏凶慝董卓造難震蕩京畿曹操階禍竊執天
衡殘剝海內懷無君之心子丕孤豎敢尋亂階盜據神
器更姓改物世濟其凶當此之時皇極幽昧天下無主
則我帝命隕越于下昭烈皇帝體明廠之德光演文武
應乾坤之運出身平難經營四方人鬼同謀百姓與能
兆民欣戴奉順符讖建位易號丕承天緒補弊興衰存
復祖業膺誕皇綱不墜於地萬國未靜早世遐殂朕以
幼冲繼統鴻基未習保傳之訓而膺祖宗之重六合壅

否社稷不建永惟所以念在匡救光載前緒未有攸濟
朕甚懼焉是以夙興夜寐不敢自逸每從菲薄以益國
用勸分務穡以阜民財授才任能以參其聽斷私降意
以養將士欲奮劍長驅指討凶逆朱旗未舉而不復隕
喪斯所謂不然我薪而自焚也殘類餘醜又支天禍恣
睢河洛阻兵未弭諸葛丞相弘毅忠壯忘身憂國先帝
托以天下以勗朕躬今授之以旄鉞之重付之以專命
之權統領步騎二十萬衆董督元戎龔行天伐除患寧

亂克復舊都在此行也昔項籍總一疆衆跨州兼土所
務者大然卒敗垓下死於東城宗族如焚為笑千載皆
不以義陵上虐下故也今賊效尤天人所怨奉時宜速
庶憑炎精祖宗威靈相助之福所向必克吳王孫權同
恤災患潛軍合謀掎角其後涼州諸國王各遣月支康
居胡侯支富康植等二十餘人請受節度大軍北出便
欲率將兵馬奮戈先驅天命既集人事又至師貞勢并
必無敵矣夫王者之兵有征無戰尊而且義莫敢抗也

故鳴條之役軍不血刃牧野之師商人倒戈今旂麾首
路其所經至亦不欲窮兵極武有能棄邪從正簞食壺
漿以迎王師者國有常典封寵大小各有品限及魏之
宗族支葉中外有能規利害審逆順之數來詣降者皆
原除之昔輔果絕親于智氏而蒙全宗之福微子去殷
項伯歸漢皆受茅土之慶此前世之明驗也若其迷沈
不反將助亂人不式王命戮及妻孥罔有攸赦廣宣恩
威貸其元帥弔其殘民他如詔書律令丞相其露布天

下俾稱朕意焉

表

羣下上漢帝請先主為漢中王表

昔唐堯至聖而四凶在朝周成仁賢而四國作難高后
稱制而諸呂竊命孝昭幼冲而上官逆謀皆馮世寵藉
履國權窮凶極亂社稷幾危非大舜周公朱虛博陸則
不能流放禽討安危定傾伏惟陛下誕姿聖德統理萬
邦而遭厄運不造之艱董卓首難蕩覆京畿曹操階禍

竊執天衡皇后太子鳩殺見害剥亂天下殘毀民物久
令陛下蒙塵憂厄幽處虛邑人神無主遏絕王命厭昧
皇極欲盜神器左將軍領司隸校尉豫荆益三州牧宜
城亭侯備受朝爵秩念在輸力以殉國難覩其機兆赫
然憤發與車騎將軍董承同謀誅操將安國家克寧舊
都會承機事不密令操游覓得遂長惡殘泯海內臣等
每懼王室大有閭樂之禍小有安定之變夙夜惴惴戰
慄累息昔在虞書敦序九族周監二代封建同姓詩著

其義歷載長久漢興之初割裂疆土尊王子弟是以卒折諸呂之難而成太宗之基臣等以備肺腑枝葉宗子藩翰心存國家念在弭亂自操破於漢中海內英雄望風蟻附而爵號不顯九錫未加非所以鎮衛社稷光昭萬世也奉辭在外禮命斷絕昔河西太守梁統等值漢中興限於山河位同權均不能相率咸推竇融以為元帥卒立效績摧破隗囂今社稷之難急於隴蜀操外吞天下內殘羣寮朝廷有蕭牆之危而禦侮未建可為寒

心臣等輒依舊典封備漢中王拜大司馬董齊六軍糾合同盟掃滅凶逆以漢中巴蜀廣漢犍為為國所署置依漢初諸侯王故典夫權宜之制苟利社稷專之可也然後功成事立臣等退伏矯罪雖死無恨

請宣大行遺詔表

伏惟大行皇帝邁仁樹德覆燾無疆昊天不弔寢疾彌留今月二十四日奄忽升遐臣妾號咷若喪考妣乃顧遺詔事惟太宗動容損益百寮發哀滿三日除服到葬

期後如禮其郡國太守相都尉縣令長三日便除服臣亮親受勅戒震畏神靈不敢有違臣請宣下奉行

前出師表

臣亮言先帝創業未半而中道崩殂今天下三分益州疲敝此誠危急存亡之秋也然侍衛之臣不懈於內忠志之士忘身於外者蓋追先帝之殊遇欲報之於陛下也誠宜開張聖聽以光先帝遺德恢弘志士之氣不宜妄自菲薄引喻失義以塞忠諫之路也宮中府中俱為

一體陟罰臧否不宜異同若有作姦犯科及為忠善者
宜付有司論其刑賞以昭陛下平明之治不宜偏私使
內外異法也侍中侍郎郭攸之費禕董允等此皆良實
志慮忠純是以先帝簡拔以遺陛下愚以為宮中之事
事無大小悉以咨之然後施行必能裨補闕漏有所廣
益也將軍向寵性行淑均曉暢軍事試用於昔日先帝
稱之曰能是以眾議舉寵以為督愚以為營中之事事
無大小悉以諮之必能使行陣和穆優劣得所也親賢

臣遠小人此先漢所以興隆也親小人遠賢臣此後漢所以傾頽也先帝在時每與臣論此事未嘗不歎息痛恨於桓靈也侍中尚書長史叅軍此悉貞亮死節之臣也願陛下親之信之則漢室之隆可指日而待也臣本布衣躬耕南陽苟全性命於亂世不求聞達於諸侯先帝不以臣卑鄙猥自枉屈三顧臣於草廬之中諮臣以當世之事由是感激遂許先帝以驅馳後值傾覆受任於敗軍之際奉命於危難之間爾來二十有一年矣先

帝知臣謹慎故臨崩寄臣以大事也受命以來夙夜憂
勤恐付託不效以傷先帝之明故五月渡瀘深入不毛
今南方已定甲兵已足當獎率三軍北定中原庶竭駑
鈍攘除姦凶興復漢室還於舊都此臣所以報先帝而
忠陛下之職分也至於斟酌損益進盡忠言則攸之禕
允之任也願陛下託臣以討賊興復之效不效則治臣
之罪以告先帝之靈若無興德之言則戮允等以章其
慢陛下亦宜自謀以諮諏善道察納雅言深追先帝遺

詔臣不勝受恩感激今當遠離臨表涕泣不知所云

後出師表

先帝慮漢賊不兩立王業不偏安故託臣以討賊也以
先帝之明量臣之才故知臣伐賊才弱敵強也然不伐
賊王業亦亡惟坐而待亡孰與伐之是故託臣而弗疑
也臣受命之日寢不安席食不甘味思惟北征宜先入
南故五月渡瀘深入不毛并日而食臣非不自惜也顧
王業不可得偏全於蜀都故冒危難以奉先帝之遺意

也而議者謂為非計今賊適疲於西又務於東兵法乘
勞此進趨之時也謹陳其事如左高帝明並日月謀臣
淵深然涉險被創危然後安今陛下未及高帝謀臣不
如良平而欲以長計取勝坐定天下此臣之未解一也
劉繇王朗各據州郡論安言計舉引聖人羣疑滿腹衆
難塞胸今歲不戰明年不征使孫策坐大遂并江東此
臣之未解二也曹操智計殊絕於人其用兵也髣髴孫
吳然困於南陽險於烏巢危於祁連偏於黎陽幾敗北

山殆死潼關然後僞定一時耳況臣才弱而欲以不危而定之此臣之未解三也曹操五攻昌霸不下四越巢湖不成任用李服而李服圖之委夏侯而夏侯敗亡先帝每稱操為能猶有此失況臣駑下何能必勝此臣之未解四也自臣到漢中中間暮年耳然喪趙雲陽羣馬王閭芝丁立白壽劉邵鄧銅等及曲長屯將七十餘人突將無前實叟青羌散騎武騎一千餘人此皆數十年之內所糾合四方之精銳非一州之所有若復數年則

損三分之二也當何以圖敵此臣之未解五也今民窮
兵疲而事不可息事不可息則住與行勞費正等而不
及虛圖之欲以一州之地與賊持久此臣之未解六也
夫難平者事也昔先帝敗軍於楚當此時曹操拊手謂
天下已定然後先帝東連吳越西取巴蜀舉兵北征夏
侯授首此操之失計而漢事將成也然後吳更違盟關
羽毀敗種歸蹉跌曹丕稱帝凡事如是難可逆見臣鞠
躬盡力死而後已至於成敗利鈍非臣之明所能逆覩

也此表亮集所無
出張儼默記

薦呂凱表

呂凱為永昌郡吏雍闓降吳吳署闓為永昌
太守凱與府丞王伉帥屬吏民閉境拒闓亮
南征上表會凱為叛夷
所殺以其子祥嗣侯

永昌郡吏呂凱府丞王伉等執忠絕域十有餘年雍闓
高定偪其東北而凱等守義不與交通臣不意永昌風
俗敦直乃爾以凱為雲南太守封陽遷亭侯

彈李平表

自先帝崩後平所在治家尚為小惠安身求名無憂國
之事臣當北出欲得平兵以鎮漢中平窮難縱橫無有
來意而求以五郡為巴州刺史去年臣欲西征欲令平
主督漢中平說司馬懿等開府辟召臣知平鄙情欲因
行之際偪臣取利也是以表平子豐督主江州隆崇其
遇以取一時之務平至之日都委諸事羣臣上下皆怪
臣待平之厚也正以大事未定漢室傾危伐平之短莫
若褒之然謂平情在於榮利而已不意平心顛倒乃爾

若事稽留將致禍敗是臣不敏言多增咎

彈廖立表

長水校尉廖立生自貴大臧否羣士公言國家不任賢
達而任俗吏又言萬人率者皆小子也誹謗先帝疵毀
衆臣人有言國家兵衆簡練部伍分明者立舉頭視屋
憤咤作色曰何足言凡如是者不可勝數羊之亂羣猶
能為害況立託在大位中人以下識真偽邪

又

立奉先帝無忠孝之心守長沙則開門就敵領巴郡則
有闇昧闇茸其事隨大將軍則誹謗譏訶侍梓宮則挾
刃斷人頭於梓宮之側陛下即位之後普增職號立隨
比為將軍面語臣曰我何宜在諸將軍中不表我為卿
上當在五校臣答將軍者隨大比耳至於卿者正方亦
未為卿也且宜在五校自是之後怏怏懷恨

臨終遺表

伏念臣賦性拙直遭時艱難興師北伐未獲全功何期

病在膏肓命垂旦夕伏願陛下清心寡慾約已愛民達孝道於先君布仁心於寰宇提拔逸隱以進賢良屏黜奸諂以厚風俗臣家成都有桑八百株薄田十五頃子孫衣食自有餘饒臣身在外別無調度隨時衣食悉仰於官不別治生以長尺寸臣死之日不使內有餘帛外有盈財以負陛下也

舉蔣琬密表

臣若不幸後事宜以付琬

奏

上言追尊甘夫人為昭烈皇后

甘后先主章武二年追諡皇思

夫人先主亮亮
上言追尊為后

皇思夫人履行修仁淑慎其身大行皇帝昔在上將嬪
配作合載育聖躬大命不融大行皇帝存時篤義垂恩
念皇思夫人神樞在遠飄飆特遣使者奉迎會大行皇
帝崩今皇思夫人神樞已到又梓宮在道園陵將成安
厝有期臣輒與太常臣賴恭等議禮記曰立愛自親始

教民孝也立敬自長始教民順也不忘其親所繇生也
春秋之義母以子貴昔高皇帝追尊太上昭靈夫人為
昭靈皇后孝和皇帝改葬其母梁貴人尊號曰恭懷皇
后孝愍皇帝亦改葬其母王夫人尊號曰靈懷皇后今
皇思夫人宜有尊號以慰寒泉之思輒與恭等案諡法
宜曰昭烈皇后詩曰穀則異室死則同穴故昭烈皇后
宜與大行皇帝合葬臣請太尉告宗廟布露天下具禮
儀別奏

疏

街亭自貶疏

臣以弱才叨竊非據親秉旄鉞以厲三軍不能訓章明
法臨事而懼至有街亭違命之闕箕谷不戒之失咎皆
在臣授任無方臣明不知人料事多闇春秋責帥臣職
是當請自貶三等以督厥咎

上事疏

臣先遣孟琰據武功水東司馬懿因渭水漲以二十日

出騎萬人來攻琰營臣作車橋越水射之賊見橋垂成
便引兵退

公文

公文上尚書

平為大臣受恩過量不思忠報橫造無端危恥不辨迷
罔上下論獄棄科導人為姦挾情志狂若無天地自度
姦露嫌心遂生聞軍臨至西嚮託疾還沮漳軍臨至沮
復還江陽平叅軍胡忠勤諫乃止今篡賊未滅社稷多

難國事惟和可以克捷不可苞含以危大業輒與行中
軍師車騎將軍都鄉侯臣劉琰使持節前軍師征西大
將軍領涼州刺史南鄭侯臣魏延前將軍都亭侯臣袁
綝左將軍領荊州刺史高陽鄉侯臣吳壹督前部右將
軍玄鄉侯臣高翔督後部後將軍安樂亭侯臣吳班領
長史綏軍將軍臣楊儀督左部行中監軍揚武將軍臣
鄧芝行前監軍征南將軍臣劉巴行中護軍偏將軍臣
費禕行前護軍偏將軍漢成亭侯臣許允行左護軍篤

信中郎將臣丁咸行右護軍偏將軍臣劉敏行護軍征南將軍當陽亭侯臣姜維行中典軍討虜將軍臣上官雋行中參軍昭武中郎將臣胡濟行參軍建義將軍臣閻晏行參軍偏將軍臣麋習行參軍裨將軍臣杜義行參軍武畧中郎將臣杜祺行參軍綏戎都尉臣盛勃領從事中郎武畧中郎將臣樊岐等議輒解平任免官祿節傳印綬符策削其爵土

教

與羣下教

夫參署者集衆思廣忠益也若遠小嫌難相違覆曠闕損矣違覆而得中猶棄弊躋而獲珠玉然人心苦不能盡惟徐元直處茲不惑又董幼宰參署七年事有不至至于十反來相啓告苟能慕元直之十一幼宰之殷勤有忠於國則亮可少過矣

又

昔初交州平屢聞得失後交元直勤見啓誨前參軍於

幼宰每言則盡後從事於偉度數有諫止雖姿性鄙暗不能悉納然與此四子終始好合亦足以明其不疑於直言也

答蔣琬教

亮開府辟琬為東曹掾
舉茂才琬固讓亮答之

思惟背親捨德以珍百姓衆人既不隱於心實又使遠近不解其義是以君宜顯其功舉以明此選之清重也

作斧教

前後所作斧都不可用前到武都鹿角壤刀斧千餘枚
賴賊已走間自令作部刀斧百枚用之百餘日初無壞
者爾乃知彼主者無意宜收治之非小事也若臨敵敗
人軍事矣

黜來敏教

將軍來敏對上官顯言新人有何功德而奪我榮資與
之邪諸人共憎我何故如是敏年老狂悖生此怨言昔
成都初定議者以為來敏亂羣先帝以新定之際故遂

含容無所禮用後劉子初選以為太子家令先帝不悅而不忍拒也今上即位吾間於知人遂復擢為將軍祭酒違議者之審見背先帝所疎外自謂能以敦厲薄俗帥之以義今既不能表退職使閉門思愆

與張裔教

去婦不顧門姜韭不入園以婦人之性草萊之情猶有所恥想忠壯者意何所之

稱姚卣

忠益者莫大于進人進人者各務其所尚今姚掾並存
剛柔以廣文武之用可謂博雅矣願諸掾各希此事以
屬其望

教

昔孫叔敖乘馬三年不知牝牡稱其賢也

又

若賊騎左右來至徒行以戰者陟嶺不便宜以車蒙陣
而待之地狹者以鋸齒而待之

與參軍掾屬教

任重才輕故多闕漏前參軍董幼宰每言輒盡數有諫止雖性鄙薄不能悉納幼宰參署七年事有不至至于十反闕有忠于國如亮可以少其過也

教

作部作七首五百枚以給騎士

又

勅作部皆作五折剛鎧十折矛以給之

書

答關雲長書

孟起兼資文武雄烈過人一世之傑黥彭之徒當與益德並驅爭先猶未及髯之絕倫逸羣也

與杜微書

微先為劉璋從事以疾去官先主定蜀微稱
聲閉門不出亮領益州牧選迎皆妙簡舊德
以微為主簿微固辭舉而致之
亮以微不聞人語于坐上與書

服聞德行飢渴歷時清濁異流無緣咨覲王元泰李伯

仁王文儀楊季休丁君幹李永南兄弟文仲寶等每歎
高志未見如舊猥以空虛統領貴州德薄任重慘慘憂
慮朝廷主公今年始十八天姿仁敏愛德下士天下之
人思慕漢室欲與君因天順民輔此明主以隆季興之
功著勲於竹帛也以謂賢愚不相為謀故自割絕守勞
而已不圖自屈也

答杜微書

微自乞老病求歸亮又與書
答之拜諫議大夫以從其志

曹丕篡弑自立為帝是猶土龍芻狗之有名也欲與羣
賢因其邪偽以正道滅之怪君未有相誨便欲求還於
山野丕又大興勞役以向吳楚今因丕多務且以閑境
勤農育養民物並治甲兵以待其挫然後伐之可使兵
不戰民不勞而天下定也君但當以德輔時耳不責君
軍事何為汲汲欲求去乎

答李嚴書

嚴與亮書勸亮宜受九
錫進爵稱王亮答之

吾與足下相知久矣可不復相解足下方誨以光國戒之以勿拘之道是以未得默已吾本東方下士誤用於先帝位極人臣祿賜百億今討賊未效知已未答而方寵齊晉坐自貴大非其義也若滅魏斬獻帝還故居與諸子並升雖十命可受況於九邪

又

吾受賜八十斛今蓄財無餘妾無副服

與張裔書

亮北住漢中欲用喬為留府長史問楊洪對
曰喬天姿明察性不公平恐不可專任不如
留向朗初喬子為洪史微過受罰喬以為恨
時或疑洪自欲作長史或知喬自嫌不願喬
處要職後喬與司鹽校尉岑述不和至
于忿恨亮與喬書論者由是明洪無私

君昔在陌下營壘吾之用心食不知味後流迸南海相
為悲歎寢不安席及其來還委付大任同獎王室自以
為與君古之石交也石交之道舉讐以相益割骨肉以
相明猶不相謝也況吾但委噫於元儉而君不能忍邪

與張喬蔣琬書

亮辟姜維為倉曹掾加奉義將軍
與留府長史張裔參軍將琬書

姜伯約忠勤時事思慮精密考其所有永南季常諸人
不如也其人涼州上士也

又

須先教中虎步兵五六千人姜伯約甚敏於軍事既有
膽義深解兵意此人心存漢室而才兼於人畢教軍事
當遣詣宮觀見主上

又

令史失賴左掾屬喪楊顯為朝中損益多矣

與蔣琬董允書

李平坐誣罔廢亮與長
史蔣琬侍中董允書

孝起前臨至吳為吾說正方腹中有鱗甲鄉黨以為不
可近吾以為鱗甲但不當犯之耳不圖復有蘇張之事
出於不意可使孝起知之

與孟達論李嚴書

部分如流趣捨罔滯正方性也

與李豐書

初亮以李嚴子豐為江州都督命嚴以中都護署府事嚴改名平亮軍祁山平催督運事值天霖雨運糧不繼呼亮來還軍退乃更陽驚軍糧餽足何以便歸又表後主說軍詐退欲以誘賊亮出其前後書疏表廢為民又教與平子豐後聞亮卒發病死平常冀亮當自補復策後人不

能故以激憤也

吾與君父子戮力以獎漢室此神明所聞非但人知之也表都護典漢中委君於東關者不與人議也謂至心感動終始可保何圖中非乎昔楚卿屢誣亦乃克復思

道則福應自然之數也願寬慰都護勤追前闕今雖解
任形業失故奴婢賓客百數十人君以中郎叅軍居府
方之氣類猶為上家若都護思負一意君與公琰推心
從事者否可復通逝可復還也詳思斯戒明吾用心臨
書長歎涕泣而已

與劉已書

劉公雄才蓋世據有荆土莫不歸德天人去就已可知
矣足下欲何之

與孟達書

達與劉封不和叛歸魏為新城太守亮南行
歸至漢陽縣降人李鴻詣亮言孟達適許見
王冲從南來言往者達之去就明公切齒欲
誅達妻子賴先主不聽耳達盡不信冲言委
仰明公無復己己亮將北伐欲誘達為外援
乃與達書達得書數相交通欲叛魏達司
馬懿征之
即斬達

往年南征歲未及還適與李鴻會於漢陽承知消息慨
然永歎以存足下平素之志豈徒空託名榮貴為乖離
乎嗚呼孟子斯實劉封侵陵足下以傷先主待士之義

又鴻道王冲造作虛語云足下量度吾心不受冲說尋
表明之言追平生之好依依東望故遣有書

與陸遜書

恪為亮兄瑾之子孫權置節度官典掌軍糧
將用恪亮與遜書遜以白權即轉恪領兵

家兄年老而恪性疎今使點主糧穀糧穀軍之要最僕
雖在遠竊用不安足下特為啟至尊轉之

與步騭書

僕前軍在五丈原原在武功西十里馬塚在武功東十

餘里有高勢攻之不便是以畱耳

與兄瑾書

兄嫌白帝兵非精練到所督則先主帳下白眊西方上兵也嫌其少也當復部分江州兵以廣益之

又

蜀志趙雲本傳云亮駐漢中出軍揚聲由斜谷道令趙雲與鄧芝往拒曹真而身攻祁山雲芝兵敗敵強失利於箕谷又趙雲別傳云雲敗退有軍資餘絹亮使分賜將士雲曰軍士無利何為有賜其物請悉入赤岸府庫須十月為冬賜按與瑾此二書似即其事也

前趙子龍退軍燒壞赤岸以北閣道緣谷一百餘里其
閣梁一頭入山腹其一頭立柱於水中今水大而急不
得安柱此其窮極不可彊也

又

頃大水暴出赤岸以南橋閣悉壞時趙子龍與鄧伯苗
一戍赤岸屯田一戍赤岸口但得緣岸與伯苗相聞而
已

又

渭水又東與陽溪合上承斜水水自斜谷分注綏陽溪北屆陳倉入故亮與兄瑾書

有綏陽小谷雖山崖絕重谿水縱橫難用行軍者邇候
往來要道通人今使前軍所治此道以向陳倉足以板
連賊勢使不得分兵東行者也

又

震為衛尉入吳賀孫
權踐祚亮與瑾書

孝起忠純之性老而益篤及其贊述東西歡樂和合有
可貴者

又

孫松字子喬權弟子為射聲校尉卒亮與瑾書

既受東朝厚遇依依於子弟又子喬良器為之惻愴見其所與亮器物感用流涕

又

殷禮字往嗣吳郡雲陽人通占候張溫以入蜀亮見歎曰東吳茲蘆中乃有奇偉如此人

與瑾書

殷往嗣秀才今之僑肝者也

又

喬字伯松亮兄瑾之子亮先未
有子求喬為嗣拜駙馬都尉

喬本當還成都今諸將子弟皆得傳運思惟宜同榮辱
今使喬督五六百兵與諸子弟傳於谷中

又

亮子瞻字思遠建興中亮出武功與
魏書瞻後為衛將軍赴郾父戰死

瞻今已八歲聰慧可愛嫌其早成恐不為重器耳

誠子書

夫君子之行靜以修身儉以養德非澹薄無以明志非寧靜無以致遠夫學欲靜也才欲學也非學無以廣才非靜無以成學惱慢則不能研精險躁則不能理性年與時馳意與日去遂成枯落多不接世悲守窮廬將復何及

又

夫酒之設合禮致情適體歸性禮終而退此和之至也主意未殫賓有餘倦可以至醉無致於亂

誠外生

夫志當存高遠慕先賢絕情欲棄凝滯使庶幾之志揭然有所存惻然有所感忍屈伸去細碎廣咨問除嫌吝雖有淹留何損於美趣何患於不濟若志不彊毅意不慷慨徒碌碌滯於俗默默束於情承竄伏於凡庸不免於下流矣

又與劉巴論張飛書

張飛雖實武人敬慕足下主公方今收合文武以定大

事足下雖天素高亮宜少降意也

書

吾心如秤不能為人作輕重

與吳王書

所送白貍薄少重見辭謝益以增慙

上先主書

先主自涪攻雒城亮遣馬良上先
主書已而軍師龐統中流矢死

亮箕太乙數今年歲次癸巳罡星在西方又觀乾象太

白臨於碓城之分主於將帥多凶少吉

太乙飛鈴

戕

戕

朝發南鄭暮宿黑水四五十里

又

漢嘉金朱提銀採之不足以自食

遠涉帖

師徒遠涉道路甚艱自及褒斜幸皆無恙使還馳此不

復具

議

正議

昔在項羽起不由德雖處華夏秉帝者之勢卒就湯鑊
為後永戒魏不審鑒今次之矣免身為幸刑在子孫而
二三子各以耆艾之齒承偽指而進書有若崇疎稱莽
之功亦將逼於元禍苟免者邪昔世祖之創迹舊基奮
羸卒數千摧莽彊旅四十餘萬於昆陽之郊夫據道討

淫不在衆寡及至孟德以其譎勝之力舉數十萬之師
救張郃於陽平勢窮慮悔僅能自脫辱其鋒銳之衆遂
喪漢中之地深知神器不可妄獲旋還未至感毒而死
子桓淫逸繼之以篡縱使二三子多逞蘇張詭靡之說
奉進驩兜滔天之辭欲以誣毀唐帝諷解禹稷所謂徒
喪文藻煩勞翰墨者矣夫大人君子之所不為也又軍
誠曰萬人必死橫行天下昔軒轅氏整卒數萬制四方
定海內況以數十萬之衆據正道而臨有罪有得而礙

者哉

絕盟好議

權有僭逆之心久矣國家所以畧其釁情者求犄角之
援也今若加顯絕讐我必深便當移兵東戍與之角力
須并其土乃議中原彼賢才尚多將相輯穆未可一朝
定也頓兵相持坐而須老使北賊得計非策之上者昔
孝文卑辭匈奴先帝優與吳盟皆應權通變弘思遠益
非匹夫之為分者也今議者咸以權利在鼎足不能并

力且志望已滿無上岸之情推此皆似是而非也何者
其智力不侔故限江自保權之不能越江猶魏賊之不
能渡漢非力有餘而利不取也若大軍致討彼土當分
裂其地以為後規下當畧民廣境示武於內非端坐者
也若就其不動而睦於我我之北伐無東顧之憂河南
之衆不得盡西此之為利亦已深矣權儻之罪未易明
也

法

作木牛流馬法

木牛者方腹曲頭一脚四足頭入領中舌著于腹載多而行少宜可大用不可小使特行者數十里羣行者二十里也曲者為牛頭雙者為牛脚橫者為牛領轉者為牛足覆者為牛背方者為牛腹垂者為牛舌曲者為牛肋刻者為牛齒立者為牛角細者為牛鞅攝者為牛鞅軸牛仰雙轆人行六尺牛行四步載一歲糧日行二十里而人不大勞流馬尺寸之數肋長三尺五寸廣三寸

厚二寸二分左右同前軸孔分墨去頭四寸徑中二寸
前腳孔分墨二寸去前軸孔四寸五分廣一寸前杠孔
去前腳孔分墨二寸七分孔長二寸廣一寸後軸孔去
前杠分墨一尺五分大小與前同後腳孔分墨去後軸
孔三寸五分大小與前同後杠孔去後腳孔分墨二寸
七分後載剋去後杠孔分墨四寸五分前杠長一尺八
寸廣二寸厚一寸五分後杠與等板方囊二枚厚八分
長二尺七寸高一尺六寸五分廣一尺六寸每枚受米

二斛三斗從上杠孔去肋下七寸前後同上杠孔去下
杠孔分墨一尺三寸孔長一寸五分廣七分八孔同前
後四脚廣二寸厚一寸五分形制如象軒長四寸徑面
四寸三分孔徑中三脚杠長二尺一寸廣一寸五分厚
一寸四分同杠耳

論

交論

勢力之交難以經遠士之相知溫不增華寒不改葉能

貫四時而不衰歷夷險而益固

記

黃陵廟記

僕躬耕南陽之畝遂蒙劉氏顧草廬勢不可卻計事善之於是情好日密相拉總師趨蜀道履黃牛因覩江山之勝亂石排空驚濤拍岸斂巨石於江中崔嵬巒岬列作三峯平治泝水順遵其道非神扶助於禹人力豈能致此耶僕縱步環覽乃見江左大山壁立林麓峯巒如

畫熟視於大江重復石壁間有神像影現焉鬚髮鬚眉
冠裳宛然如彩畫者前豎一旌旗右駐一黃犢猶如董
工開導之勢古傳所載黃龍助禹開江治水九載而功
成信不誣也惜乎廟貌廢去使人太息神有功助禹開
江不事鑿斧順濟舟航當廟食茲土僕復而興之再建
其廟號目之曰黃牛廟以顯神功

碑

司馬季主墓碑

玄漢太寂混合陰陽天地交泮萬品滋彰先生理著分別柔剛鬼神以觀六度顯明

南中紀功碑陰銘

萬歲後勝我者過此

令

軍令

敵以來進持鹿角兵悉却在連街後敵已附鹿角裏兵但得進踞以矛戟刺之不得此住起住妨弩壞

又

連衡陣狹而厚也

又

荆非少人也而著籍者寡平居發調即人心不悅凡有游戶皆使自實因錄以一衆可也

軍令

始出營豎矛戟舒旂旗鳴鼓角三里辟矛戟結旂旗鳴鼓角未至營三里復豎矛戟舒旂旗鳴鼓角復結旂旗

鳴鼓角違令者斃

兵軍要誠

枝葉彊大比居同勢各結朋黨競進儉人有此不去是
謂敗徵

詩

梁甫吟

晏子云公孫撓田開疆古冶子事景公勇而
無禮晏子言於公觀之二挑曰三子計功而
食桃公孫撓曰吾再拜隨虎功可以食田曰
吾仗兵而御三軍者再功可以食古冶子曰


君當濟河龜銜左駢治潛行水底逆流百步
從流九里得龜頭功可以食二子曰吾勇不
君子功不逮子取挑不諫是貪也然而不死
無勇也刎頭而死治曰二子死之治獨不逮
又刎頭而死

步出齊城門遙望蕩陰里里中有三墳纍纍正相似問
是誰家墓田疆古冶子力能排南山又能絕地紀一朝
被讒言二挑殺三士誰能為此謀國相齊晏子

滄浪詩評云孔

明梁甫吟步出齊東門遙望蕩陰里樂府解題作追望
陰陽里青州有陰陽里田疆古冶子解題作田强固野
子西溪叢語云李善陸詩註蔡邕琴頌云梁父悲吟不
知名為梁父吟何義張衡四愁詩云欲往從之梁父艱

注云泰山東嶽也君有德則封此山願輔佐君王致於
有德而為小人讒邪之所阻梁父泰山下小山名諸葛
亮好為梁父吟恐取此意



漢魏六朝百三家集卷二十二